

Efesoóhu

Chalapacücunäman

Pablo Cartacuśhan

Roma nasyunpa sumä puydinin malcam Efeso cala. Chay malcaóhümi Pablo caycula. Chay quimsa cuti watucuyinínchümi imaymana pasala: rüjacunam wanaculcäla, capillachacunacta luläcunapis lücutacälälilam. Caycunapi masta yaóhaycunayquipä Hechos 19, jinaman 20.13-38.

Pablo carsilóhu cayalñam cay cartacta isquirbila. Cay cartap allaycuyinínchümi limapämanchic Jesúsóhu mayan caśhanchictapis: Paymi cuyacuynínóhu paypa canapä aclamälanchic. Masqui Israel mana-Israel-tapis paymi jucllachaycamälanchic jucnüpa manaña licanacuyänapä. Óhawpipi ipaman'a Jesuspa nunancunanuy imanuyca cawsaycunapämi limapaycamanchic.

1 ¹Tayta Diospa munayninwan Jesusninchicpa jucnin puydi caóhan ya'a Pablom isquirbiyamú, Taytallanchicpäña japáchaycuśhan Jesusman chalapacü-masí Efesoóhu cäcunäpä. ²Quiquin Tayta Diosninchicwan Duyñunchic Jesuspa llaquipayninpita jawca cawsay amcunaóhu caycuchun.

¡Jesusninchic maynu maynümi llaquipaycamälanchic!

³¡Jesusninchicpa Taytan Dios sumä alawaycuśha cachun! Paymi Jesusninchicóhu lluy imaymanactalä janay pachäpä allinninchicpä uycamanchic. ⁴Payóhümi cay pacha manaläpis captin aclamälanchic mana juchayu chuyallactaña licaycamänanchicpä. ⁵Paypa śhun'unpi yaluycamuśhanpam sumä cuyacuyninwan Jesusninchicóhu unanchaycamälanchic chulinpäña licaśha cananchicpä. ⁶Chaymi maynu sumä llaquipayniyu caśhanta cuyay śhuñayninwan camalaycachimäśhanchicpi alawanchic.

⁷⁻⁸Yawarninpa éhaninwanmi juchanchicta pampachaycamälanchic. Masqui lluy imanuy caśhanchicta tuquicta yaóhayalpis, tantiayalpis caywanmi sumä-sumä llaquipaycamäśhanchicta camalaycachimä-

lanchic. ⁹Jinaman'a pacalä munaynintam Jesusta cáchamuśhanwan sumä cushicuywan lisiycachimälanchic. ¹⁰Caymi munaynin: Lluy pasanancuna pasäluptin cay pachächu janay pachächu lluy cäcunäta Salbacü Jesusllanchicpa maquillanman éhulaycuymi.

¹¹Manalä imapis captin, munayninmannuy tincüninmannuy lulaycü quiquin Tayta Diosmi: "Ya'allapä capäcun'a" nil aclaycälimalä. ¹²Natac cay cal'a Jesusman ya'acuna wamä chalapacücunaca sumä cayninta altuman julaycälinäpämi. ¹³Canan amcunactapis cay rasun allin willacuy salbaycücäta uyalipäcushayquipam Jesusninchicman éhulaycälishulanqui. Cayman chalapaculcaptiquim limalicushan Chuya Ispiritunta uycushushayquiwan payllapaña cashayquita unanchaycälishulanqui. ¹⁴Cay Ispiritun ya'anchicchu cashancäwanmi tacyalpachimanchic paypa lluy cäcunäta Tayta Dios salbaycuptin tucäninchicta éhasquiycunapä. ¡Chayurá sumä cayninpi alawäsha cachun!

Chalapacücunäpämi Pablo mañacun

¹⁵⁻¹⁶Chaymi amcunapis Jesusninchicman maynu sumä chalapaculcäshayquita, jinaman chalapacücunäta cuyapäcushayquita yačhaśhá pachapi, imaypis jinallam amcunapi sulpayta ucü. ¹⁷Chaymi imaypis Jesusninchicpa maynu sumä-sumä Dios Taytanta mañacuyá; yačhayta tantiayta uycälishuptiqui imanuy cashantapis sumäta yačhaycälinayquipä. ¹⁸Chaynütac imapä ayaśha capäcushayquitapis tantiayniquita quichaycul tantiaycälischishunayquipämi; jinaman nunancunapä maynu tucäninchiccuna llüllay-llüllay cashantapis yačhaycunayquipämi; ¹⁹chaynütac maynu maynu sumä munayninta chalapacünincunaman éhulaycushanta tantiaycälinayquipäpis. ²⁰⁻²¹Chay quiquin munayninwanmari Jesusta wañucäpi śhalcalcachimul allininmanlä taycaycachila lluy ima munayniyüpäpis mandacücunapäpis, puydicunapäpis, cay pachächu janay pachächu lluy lluyta altunninmanlä caynu munayniyüllä cananpis imaycmapis cananpä. ²²Jinaman'a Tayta Dios paypa maquillanmanmi lluy imacunactapis éhulaycula. Chaynütacmi llapa chalapacünincunap umanpä éhulaycula. ²³Cay chalapacünincuna quiquin Jesupa aychanmi cayan, lluy imactapis cabalalpücäpa cabalalpüśha cayal.

Allin lulayllanchicpachu manam salbaśha canchic

2 ¹⁻²Amcuna punta cawsayniquičhu juchayquiwan mana allin lulayniquiwan wiñaypä wañüşham cawsapäculanqui cay pachäpa munayninta atichishtin. Aśhta waywacunačhu mana allin ispiritucunap puydininpa munayninmannümi cawsapäculanqui canpis chay mana uyalicü nunacunäta canan jicutachicäta ati-

chishtin. ³Chaynümari lluyypis unay cawsalanchic, aychanchicpa munayllanču umanchicman éhämúshallanta lulaštín. Juccuna-nüpis caynümi milayninchicpi shamulanchic Diospa piñacuyninču cananchipä. ⁴⁻⁵Chaynu juchanchicwan wañúsha cayptinchicpis sumä llaquipayniyu Tayta Diosmi cuyayninču Jesusninchicwan cawsayta uycallämanchic. Llaquipayllanpam dinbaldilla salbaycuśha canchic. ⁶⁻⁷Wañuycäpi paywan cuscacta shalcalcachilñatacmi janay pachächülä paywan cuscactatac taycaycachimanchic chay llaquipaynin sumä-sumä caycuśhanta wiñay cawsaycächu licaycachimänanchicpä. ⁸⁻⁹Ñatac llaquipayllanpam chalapacuśhallanchicpa salbaycuśha canchic. Caynu salbaśha cayanchic manam imallactapis lulaycuśhanchicpachu, sinu'a Tayta Dios dinbaldilla uycamanchic ima allincällacta lulaycuśhanchicpi mana mayanpis alawacunanpämi. ¹⁰Aśhwanpa Tayta Diospa allin lulaśhanca ya'anchicmari cayanchic. Jinaman'a unaypiñatacmi unanchaycamälanchic Jesusninchicpa ya'anchicpis allincällactaña lulaycunapä.

Ishcay caštacunapimi juc malcallacta shalcaycachimanchic

¹¹⁻¹²Amcuna milayniquipi mana-Israel cašta cäcuna yalpapäcuy Jesuspi unay japächäsha capäcuśhayquita. Yalpapäcuytac Diospa malcanpi juc-läduču capäcuśhayquita - chay umri cayninču nunacunallap maquinwan “siñalachicüśha” nishan malcäpi, chay “mana siñalachicüśha” nipäcuśhuśhayqui malcäpi. Yalpapäcuytac Tayta Diospa limalicüśhancunawan limanacuśhancuna amcunap mana caśhanta, chaynütac cay pachächu mana Diosniyu ni chalapacuyniyu cawsapäcuśhayquitapis. ¹³Ñatac chaynu unay japächäsha cayalcaptiquipis canan'a Jesusninchic yawar jichaśhanwanmi ayllunmanña chuläśha capäcunqui.

¹⁴Canan Jesusmi pulanchictapis jawcacta cawsaycachimanchic. Chay éhininacuywan laquinacuśhanchiccäta pampaman muyulcachilmi, ishcaj malcacunapi jucllay malcallaman muyuycachimanchic. ¹⁵Chay Moisespa camachicuyinincunacta lluy mandamäshanchic-cunactawanmari wañuyninwan pampaman muyuycachila, chay ishcajnin éhininacü caštacunäta amistalcachil quiquinču juc muśhü malcallacta shalcachinanpä. ¹⁶Chay curuśhcächümi wañula éhininacuytä camacaycul ishcajnin caštacunäta allinpa tincuycachimänanchicpä, juc malcallamanña muyuycachimänanchicpä, Tayta Dioswan allinpa licaycachimänanchicpäpis. ¹⁷Cay jawca cawsay allin willacuytam Jesus apaycamula am unay japächäsha mana-Israel caštacunapäwan Israelcunapäpis. ¹⁸Chayurá paypam Israel mana-Israel caštapis Chuya Ispiritunpa yanapayninwan Tayta Diosninchicman aśhuycuchwan.

¹⁹Chaymi manaña yan'al pulicüchu ni juc-läduchu alapacüshañachu capäcunquipis. Sinu'a Tayta Diospa malcanchu nunancunap malca-masinñam, paypa ayllunñam cayalcanqui. ²⁰Amcuna sumä simintäsha wasi pilañanümi cayalcanqui. Chay simintu puydi yaçhacünincunawan willacünincunam. Quiquin Jesusñatacmi wasita sumä chahaläca. ²¹Paychümi llapan wasica cäninchü-cama llapan pilacacuyan, ashta sumä chuya wasinuy ishpiycälincama. ²²Amcunapis paywan jucllaña cayalcalmi chay Tayta Diospa Chuya Ispiritun yaçhañan chuya wasiña ishpiycälisha cayalcanqui.

Diospa pacacuynintam camalachin

3 ¹Cay-laycumari canan ya'a Pablo carsilchu wíchalayá Jesuspa allin willacuyninta am mana-Israelcunäman willaycälishacpita. ²Uyalipäcullanquiñam Tayta Diospa llaquipayninta amcunaman apaycamunäpä nimäshanta. ³Cay pacaläcäta Diosninchic yaçhaycachimäshanimari janaychu uchucllacta isquirbiycälilac. ⁴Cay cartacamuñhata licaycälil'a tantiapäcunquim Salbacü Jesuspa cay pacacuyninta maynu allicta lisishätapis. ⁵Cayta manam mayantapis unay lisiycachilachu. Cananmi ichá Chuya Ispiritunpa puydi caçhancunactawan willacünincunacta camalaycachin. ⁶Caymi chay pacacuynin: Cay allin willacuypam juc caşhtacunäpis Israelcunap tücäninta çhasqui-masin capäcun'a; juc nunanüllamari caycälina; jinamanmi Diosninchic Jesusninchicpa lluy limalicushancunätapis çhasquipäcun'a.

⁷Tayta Diosmi ya'acta llaquipaycul cay allin willacuyninta jinantin pachäman willacunäpä jatun munayninwan çhulaycamäla. ⁸Masqui lluy chalapacücunäpi mana cäpa licañhannin cayaptipis Tayta Diosmi llaquipayninchu cay Salbacü Jesuspi sumänin allin willacuyninta mana-Israelcunäman willacunäpäla aclaycamäla. ⁹Lluy imactapis lulä Tayta Dios una-unaypi pacacuyninta imanuyca camalaycachinanta camalaycachinäpämi aclaycamäla. ¹⁰Chaynupamari sumä-sumä yaçhayniyu caşhanta chalapacünincunawan tantiachin'a janay pachächu munayniyucunätapis. ¹¹Lluy caycuna cumpticacunäpämi una unaypi camachishancäta Salbacü Jesusninchicwan cabalalpun. ¹²Cananmi ichá Jesuspa cayninchicwan chalapacuyninchicwan mana manchalillañä cunfiacuywan Tayta Diosninchicman aşhucuchwan. ¹³Chaymi amcuna-laycu sasachacuycunacta pasashäpi ama jucmanyapäcuychu, aşhwanpa tantiapäcuy alliniquipä caşhanta.

Chalapacücunäpämi yapa mañacun

¹⁴⁻¹⁶ Cay-laycumari un'ulacuycul janay pachächu cay pachächu cäcunäta juc ayllullaman éhulaycämäshanchic Taytanchicta mañacú caycunapä: Pay sumä jatun cayninman tincüta Chuya Ispiritunwan shun'uyquiman munayninta éhulaycul, callpanchaycälishunayquipä; ¹⁷⁻¹⁸ chaynütac Jesusninchic masisu shun'uyquichu tacyaycachishunayquipä; chaynu sumä sapichacüsha cuyacuychu tacyaycälil llapa chalapacü-masiquicunawan Jesusninchicpa cuyacuynin maynu-maynu altumanpis, lulimanpis mana camacaycú silup camacaynincamapis cañhanta tantiaycälinayquipäpis. ¹⁹ Jinaman'a cay mana lisiyta atipäshanchic sumä-sumä cuyacuyninta lisiycälinayquipä; chaynütac Tayta Dioswan mana camacaycú juntay-juntayta quiquinta lisiycällichishunayquipäpis.

²⁰ ¡Canan caynu mañacuśhanchicpispis tantiaśhanchicpispis sumä mas mastalä ya'anchicchu munayninwan lulaycüca altuman juluycuśha cachun! ²¹ ¡Jesusninchicpa lluy chalapacücunächu imaypis imaycamapis wiña-wiñaypä pay altuman juluycuśha cachun! Chaynu cachun.

Jesusninchicéhümi juclayllaña lluypis canchic

4 ¹ Chayurá canan Jesusninchic-laycu caychu wiéhaläcämi niycälic, maynu imapä ayaśha capäcuśhayquinu-ari sumäpa cawsaycäliy.

² Mana nunatucullal, allin shun'uyülla, lluywanpis cuyanacuywan awantanacaycäliy-ari. ³ Nñatac Chuya Ispiritup yanapayninwan juc nunanülla, jawca cawsaycächu caycälinayquipä impiñaculcay.

⁴ Caynu caycälinayqui juc aychallapi lluypis cayaptinchicmi, juclaylla Ispiritupis cayaptinmi, chaynütac Tayta Dios juc limalicuyllaman alcayllaman ayamaptinchicmi. ⁵ Juclayllatacmi Duyñunchicpis, jucllamantacmi chalapacunchicpis, jucllapatacmi bawtisacunchicpis.

⁶ Juc Tayta Diosllapimi lluypis canchic; payllap munayninéhütacmi lluypis cayanchic. Payllatacmi lluywanpis lluychépispis cayan.

⁷⁻⁸ Nñatac quiquin Jesus munaśhanmannümi lluytapis uycamälanchic imaymana lulaycunactawan yaéhaycunacta Diospa shiminéchu nishanmannuy: "Lluy llallishancunäta puśhaculcul janay pachäta cutiyininwanmi nunacunäman ima lulaynincunactapis aypuchacula"^a nil.

⁹ (Tantiapäcuy: Janay pachäman cutiypi limayaptin'a tantiachimanchic janaypita cay pachap luli sapincama ji'alpamuśhantam.

¹⁰ Cay quiquin ji'alpamücätacmi janay pachäpa mas altunninmanlä ishpila lluy jinantinéchu cananpä.) ¹¹ Pay quiquinmi éhulaycun

^a 4.7-8 Sal 68.18.

waquincunactá puydi yaćhapacünincunapä, waquincunactá pudir-ninnu willacünincunapä, waquincunactá allin willacuyninta willacunanpä, waquincunactá chalapacünincunacta michinanpä caminaycunanpämi. ¹²⁻¹³Caycunacta lluy uycula nunancuna aychan-yupay cäcunäta sirbiycälinanpämi. Chaynüpam ishpiycachimanchic juc nunanülla Diospa Chulin Jesusman chalapacunanchiccama lisiycunanchiccama. Chaynu wiñayculcha pu'ulpuşhun quiquin Jesus-ninchic caşhanmannuy.

¹⁴Chaycha lamarcächu yacüta waywaca wicman cayman apaycachaşhan-yupay uchuc nunacunänüllañachu imaymana yaćhachicuycunawan nıtac imaymanap iwısha mishqui aticuna-yupay cänincunawanpis aysachicuyäşhunchu. ¹⁵Aşhwanpa ya'anchicmi ichä cuyacuywan allincäta willaycul umanchic cä Jesusninchicchu walan-walan lluy imaćhüpis wiñaycuşhun. ¹⁶Paypamari jinantin aychaca sumä cällançu caycunchic. Chaynu tuqui tincüllanman caw-sayculmi llapa aychanpis lulayninta-cama lulayalcal allin cuyacuyçu wiñayanchic.

Diosta mana lisićunänu'a ama-ari cawsaşhunchu

¹⁷Chayurá Jesuspa pudirnin cayniwan caytam anyaycälic: Dios-ninchicta mana lisićunacuna uman chalaşhançu pulicunänuay amaña cawsapäcuychu. ¹⁸Chaycuna şhun'un lumiyäşha tantiaynin-pis tutapäşha cayaptinmi Tayta Dios allin cawsay unancätapis mana tantiapäcunchu. ¹⁹Chaymi paycuna cärançu mana yawarniyu, imaymana mana allin lulaycunällamanña alacaculcul, imawanpis manaña şhaycaycälil, uman chalaşhallantaña lulayta jicutayalcanpis.

²⁰⁻²¹Ñatac amcuná Jesuspi rasunpa allincäta ćhasquiya'la caycunactachu manamá yaćhapäculanqui. ²²Sinu'a chay ismüsha mawca punta bıdayqui pasaypi imaymana mana allin lulaycunäpi ingañacuycunapi japächaculcänayquipämari. ²³⁻²⁴Aşhwanpam muşhü şhun'uyu tantiayniyu Tayta Dios camaşhan tuqui allin muşhü caw-sayta ćhulaculcanqui rasuncämannuy cawsapäcunayquipä.

²⁵Chaymi casquicuycunacta caćhaycul rasuncällacta imaypis nuna-masiquiwan limaycäliy, juc caşhtalla, juc aychalla caşhanchic-laycu.

²⁶Mayanpis piñacälil'la ama aysachicuyalcaychu juchamanlá. Amatac inti ji'alpunancama piñacuyniqui dırayächunchu. ²⁷Chay piñacuyniquiwan'a achatütam inquitayanqui.

²⁸Ñatac suwacücunäpis amañatac mastá lulachunñachu. Aşhwanpa südayninta jitachun pishipacücunäta imallawanpis yanapaycunanpä. ²⁹Amatac imaypis juyu limaycuna shimiquipi yaluchunchu. Aşhwanpa allincälla yaluycuchun uyalicunäta imallaćhüpis yanapaycuptin tacyaycunanpä. ³⁰Chaynu mana allin cawsayniquiwan

amatac Chuya Ispiritucta llaquichipäcuychu. Yalpapäcuy: paywanmi amcuna unanchäsha cayalcanqui julushushayquita chay shamü muyunöchu cabalalpuşhunayquipä.

³¹Chayurá amcunapi wicapapäcuy: rabyacuycunäta, piñanacuycunäta, palanacuycunäta, jamuyänacuycunäta, lluy mana allinpa apanacuycunätapis. ³²Aşhwanpa llaquipanacuycü-cama caycäliy. Maynümi Tayta Dios Jesuswan pampachaycälishulanqui, chaynu-ari quiquiqui-pula nanachinacälililpis pampachanacaycäliy.

5 ¹Natac Tayta Diospa cuyay chulinña cayalcal'a laşchéhun-man-ari jaluycuşhun. ²Maynümi Jesus cuyamayninchiwan juchanchic-laycu Diospa şhun'unpa mishqui ufrinda-yupay wañuycä-man éhulacula, chaynümi sumäpa cuyacuycunaw cawsaycunanchic. ³Natac mansibacuycuna nï ima mana allin anlacunapis nï imapi ambisyacuycunapis amcunöchu canmanñachu limalcälinallayquipäpis. Caycuna manañamari tincunchu Diospa nunancunawan'a. ⁴Manañatacmi juyu limaycuna, upa limaycuna, nï mana bäli jucman liyá limaycunapis canmanñachu. Aşhwanpa shimiquipi Taytanchicta sulpayta uycuylla yalaycamuchun.

⁵Sumäta uyalipäcuy: Tayta Diospäwan Jesuspa gubirnunman manam yaycapäcun'achu mayanllan mansibädupis, anla lulaycunallaöchu cäcunapis, nï imapi lägacücunapis. Cay lägacuyninmari taytachancuna. ⁶Ama-ari chay mana pasä limäcunawan'a ingañachicuyalcaychu. Rasunpa caynu luläcunätá Diospa piñacuyninmi sumä-sumä alcayan. ⁷Chaymi paycunap lulä-masin nï uchuyllapis caycälinayquichu. ⁸Chaynu unay tutapa yanawyayäcöchu cawsapäcunayquipitam ichá canan Jesuspa acchinña cawsayniquiöchu acchihan. Chayurá acchöchu cawsapäcuşhayquitari sumäpa camalaycachipäcuy. ⁹Chay acchim cawsayninchiöchu allincällacta, tincüllanman cäcäta, rasuncällacta camalaycachimun. ¹⁰Chayurá Tayta Diospa şhun'unpänuycun imacuna caşhantapis yaöhaycälinayquim. ¹¹Natac manam imallactapis uculcänayquichu chay tutawyayäcäpa mana allin yan'al lulaynincunacta atichiypitä. Aşhwanpa chay lulaynincunacta acchöwan camalaycachipäcuy. ¹²Chay pacallap mana allin lulaynincunacta limalcunapäpis pin'aypämi cayan. ¹³Acchöman lluy imactapis éhulaycuşham ichá imanuy caşhanpis lluy camalacun. ¹⁴Chaymi ninchiapis:

“Am puñucuna tutawyayäcäpi licaöhaculcay, wañuşhacuna yanawyayäcäpi şhalcapäcuy. Jesusninchiemi acchöniqui cayan”^b nil.

^b5.14 Cay unay taqui Isaiaspa isquirbishancunapimi yalamun. Licay Is 26.19; 51.17; 52.1; 60.1.

¹⁵Chayurá imanuy cawsapäcushayquitapis allicta tantiacaycäli. Amatac mana umayünuy'a cawsapäcuychu, sinu'a sumä fisyu-sapa nunanuy cawsapäcuy. ¹⁶Muyuncunäta ama usuchipäcuychu; mana allin timpucunaçhüñam cayanchic. ¹⁷Chayurá ama-ari tullu uma cayalcaychu. Ašhwanpa Tayta Diospa munayninta lulaycälinayquipä callpanchaculcay. ¹⁸Amatac binucunawan shin-cacuyalcaychu bïdayquita apachicunallayquipä. Ašhwanpa Chuya Ispiritup munayllanwan apachiculcay. ¹⁹⁻²⁰Chaycha amcunaçhu caycun'a imaymana taquicunalla, imnucunalla, šhun'unchicpi yalamü taquicunapis. Chaynu-ari šhun'uyquiçhu Taytanchicpa taquicuna caycuchun lluy imaçhüpis imapïpis Jesusninchicpa Tayta Diosninchicta sulpäta ucuštïn.

Wayapactawan walmintintam limapaycun

²¹Jesusninchicta manchaculcal'a quiquiqui-pulacunapis manchacuywan sujitanaculcay. ²²Jesusninchicman-yupay-ari walmicuna wayapayquita cäsuculcay. ²³Pay'a walminpa umanmari cayan chay aychan-yupay chalapacünincunacta salbaycušhancäpa uman Jesusninchicnuy. ²⁴Maynümi chalapacünincuna Jesusta cäsuculcan, chaynümi walmicunäpis ima aycaçhüpis wayapanta cäsuculcänan.

²⁵Ñatac maynümi Jesus chalapacünincunacta cuyayninwan wañuycäcama çhaycula chaynu-ari wayapacuna walmiquita cuyapäcuy. ²⁶⁻²⁷Paymi yacuwannu Taytanpa shiminwan chalapacünincunacta pa'aycula mana juchayu, mana anlayu, mana shipüšha, nï imanaycušhallapis sumä-sumä chuya cäninman-camallacta quiquinman pušhaycunanpä. ²⁸Maynümi wayapaca aychanta ama-pacha nin, chaynümi walminta cuyapäcunan. Walminta cuyäcä quiquintamá cuyacun. ²⁹⁻³⁰Manamá mayanpis quiquinpa aychanta çhincunchu. Ašhwanpam licaycul alcansaycun. Chaynümi Jesus quiquinpa aychan cä chalapacünincunawan lulaycamanchic. ³¹Chaymari niyanpis: "Wayapaca taytanta mamanta cächaycul walmillanwanña jucllanchanacun'a juc aychalla cananpä"^c nil. ³²Cay rasunpa sasa tantiay captinpis tincuchin Jesuspa aychan chalapacüninaca cašhanchictam. ³³Amcunapäpis niyalcäšhunquitacmi: wayapaca quiquinpa aychantanümi walminta cuyanan. Walmipis wayapanta rispïtuwanmi licanan.

Taytactawan chulintam limapaycun

6 ¹Chulicuna, Tayta Diospa chulin cayalcalñä taytayquicunacta cäsuculcänayquim. Caymari Jesusninchicpa tincüninman.

^c 5.31 Gn 2.24.

2-3Ñatac camachicucunapi caymi limalicuyuniyu: “Taytayquita mamayquita allinpa licapäcuy achca wata cushisha cawsayniyu ima-
 çhüpis allin capäcunayquipä”^d nil.

4Am taytacunäpis amatac chuliquicunacta piñayalcächiychu. Aşhwanpa Jesusninchicpa allin cällanman caminaycul limapaycul ishpiycällichiy.

Uywaycunätam duyñuntawan limapaycun

5Uyway nunacunäpis cay pachächu cä duyñuyquita cäsuculcay. Jesusninchicpänu-ari manchacuywan rispituwan llapan şhun'uyquiwan lulayniquita lulaycuy. 6Ama-ari licapäşhullaptiqui'a allinpa licachicuyllayquiwan'a lulayaychu, aşhwanpa Jesuspa nunanuy llapan callpayquiwan Tayta Diospa şhun'unpänuy bïbulla lulaycuy. 7Lulayniquicunacta sumä gänaşhwan Jesusninchicpä-nuy lulaycäliy, ama nunacunallapänüchu. 8Yalpapäcuy-ari uyway, mana uyway nunactapis allin lulaşhanchicmannu Jesusninchic uycamänanchicta.

9Ñatac am duyñucunapis amaña aminosayaychu, aşhwanpa uywayni-
 quita allinpa licapäcuy. Yalpapäcuy-ari, uywayniquicunapapis amcunapapis Duyñuyqui janay pachächu caşhanta. Pay'a lluytapis manam juc-jucpächu licamanchic.

Difindiculcänanpämi limapaycun

10Chalapacü-masïcuna, canan camacalpunäpä nishayqui: sumä munayniyu cä Jesusninchicwan jucllaña cayniquiwan-ari masïsu caycäliy. 11Ñatac difindicunanchicpä Tayta Dios lluy umäşhanchic-
 cunäwan müdacuşhun, supaycäpa mala-mäñancunaçu masïsu şhaycucunapä. 12Caynu pilyayanchic manam aychayu tulluyu nunawanchu, sinu'a cay yanawyayä pachächu sumä munayniyücunä-
 wanmi, puydinincunawanmi, maquinchu cachïcunawanmi, ñatac altuču cä mana allin ispiritucunawanpis. 13Chaymi Tayta Dios lluy difindicunanchicpä umäşhanchiccunäta sumäpa uywaşhun imapis çhamuptin mana uchuclactapis aşhutyalcul masïsu şhaycucunapä. Caynu lluy camacäluptinmi masïsu jinalla şhäcuyäşhunlä.

14Chayurä sumä rasuncäwan-ari waçhacuwan-yupaypis sumäta watacuşhun. Chaynütac Diosninchicpa allinninwan-ari çhulacu-
 şhun cachacup atajacü chalicunwannüpis. 15Jinaman Jesusninchicpa allin jawca cawsay willacuyninwan sapatuwan-yupay çhulacuşhun mana lluchcallal masïsuca tacyaycachimänanchicpä. 16Imaypis atajachicü-yupay chalapacuyninchicwan caycuşhun supaycäpa şhan-

^d6.2-3 Ex 20.12; Dt 5.16.

shay-shanshay lansancunacta lluy chashnunanchicpä. ¹⁷Chaynütac salbaśhaña caśhanchicta umanchicman éhulacuśhun cascunuy atajamānanchicpä. Jinaman Diosninchicpa chay shimin Chuya Ispiritup ispādan cācātari maquinchicwan aptishun. ¹⁸Ñatac maychūpis imaypis lluy chalapacü-masinchiccunapīpis Chuya Ispiritup munayninchu Taytanchicta mañacuyninchiccunaachu jicutaycuśhun lichcat-lichcat mana jucmanyällal. ¹⁹Chaynütac ya'apīpis Taytanchicta mañaculcay, pacalāśha allin willacuyninta shimīman éhulaycamuptin sumä callpawan willaycunäpä. ²⁰Cay-laycumari pudirnin caśhäpi éhänäśha-yupay canan cayá. Chayurá Taytanchicta mañaculcay mana manchalillal callpawan willacunäcäta willaycunäpä.

Camacalpunanpä limaycun

²¹Ñatac sumä cyaśhá cunfiacuna lulawshī-masinchic chalapacü-masinchic Tiquicom ya'apīta lluy willaycālishunqui. ²²Caypāmari caśhayāmú, ya'acunaachu imacuna pasaśhantapis yaśhaycul callpanchaculcānayquipä.

²³Cyaśhá chalapacü-masīcuna, Tayta Diosninchicwan Jesusninchic jawca cawsayta, cuyacuyta, chalapacuychu tacyacuyta uycālishunqui. ²⁴Mana camacaycū cuyacuywan Jesusninchicta cuyacunätä llaquipayllanachu cyačālichishunqui. Chaynu cachun.